

## SOLOMON ENA ANE

<sup>1</sup> Ane Herea-daena, Solomon ena.

<sup>2</sup> Udumu haherahuna amo boma harahugu,  
badina be emu uraheni ese vine ranuna e  
hereaiamu.

<sup>3</sup> Emu hedahu muramuradia bonadia na nanamo  
heherea;  
oi ladamu na dehoro e seiamu na heto.  
Una dainai ulato ese e ura henimumu.

<sup>4</sup> Murimu ai a verigu kau! Aitala haraḡa;  
hanua pavapavana ese ena rumia vada e  
hakaugu vareai.

Baia heatolaimu, baia moalelaimu;  
emu uraheni baia imodaia bada, vine ranuna  
baia imodaia maraḡi.

Mai badina idia ese e ura henimumu.

<sup>5</sup> Ierusalem kekenimui e,  
kopigu na korema-korema, to ita-itagu na  
namo,

Kedara dabua rumadia na heheto,  
Solomon ena seseahu na heheto.

<sup>6</sup> Kopigu na korema-korema dainai basio raraigu;  
badina be dina ese vada e raragu.

Taihugu ese e badu heniguva,  
vine imeadia ireḡudia ai e halaogu;  
a lauegu imea na asina regua.

<sup>7</sup> Egu lalokau taumu e, ba hadibagu,  
emu mamoe na edesenai ai o ubudiamu?  
Dina tubua ai edesenai ai o hahekurediamu?

Bamomu edia seri badidiai baina loa eva-eva  
anina be dahaka?

\*\*\*\*\*

<sup>8</sup> Hane namo e, bema asi dibamu,  
mamoe vatagadia ba ġavadia;  
emu nani natudia na mamoe ireġudia taudia  
edia kalaga badidiai ba ubudia.

\*\*\*\*\*

<sup>9</sup> Egu lalokau e, Farao ena kariota hosina ta ida  
aina haheġereġeremu.

<sup>10</sup> Vahamu mai heraheradia ita-itadia na nanamo  
heherea,  
bona aiomu mai agevana danu.

<sup>11</sup> Ihaheralaimu ġaudia baia kara,  
*gold* heraheradia mai *silver-dia*.

\*\*\*\*\*

<sup>12</sup> Hanua pavapavana na e ege dihova negana ai,  
egu muramura bonana namona e daeva.

<sup>13</sup> Egu lalokau na muro\* modana ta,  
ratagu padadiai e miamu.

<sup>14</sup> Egu lalokau na kofere† buredia idabubuna ta,  
En-gedi vine-imeadia ai.

\*\*\*\*\*

<sup>15</sup> Egu lalokau e, oi na hane namo,  
momokani, oi na hane namo.

Matamu na pune.

\*\*\*\*\*

\* **1:13** “Muro” na Heberu taudia edia muramura mai bonana ta.

† **1:14** “Kofere” na Heberu taudia edia muramura avana ta.

<sup>16</sup> Egu lalokau e, oi na raho namo taumu;  
 momokani, oi na mai hairaimu.  
 Eda mahuta patana na gadoka-gadoka,  
<sup>17</sup> eda rumā audia na sida,  
 eda rumā toidaedia na beroso‡ audia.

## 2

<sup>1</sup> Lau na Saron vahuvahuna,  
 koura ai e varamu sosanana.\*  
 \*\*\*\*\*

<sup>2</sup> Ulato bogaragidiai egu lalokau na  
 sosana burena siniura bogaragidiai na heto.  
 \*\*\*\*\*

<sup>3</sup> Uhau bogaragidiai egu lalokau na  
 apolo auna uda audia bogaragidiai na heto.  
 Ia ikerukeruna ai na helai mai moale-badagu ida;  
 huahuana na mai gaihona udugu ai.

<sup>4</sup> Aria rumana ai e hakaugu lao;  
 ena pepe lau daegu ai na lalokau.

<sup>5</sup> Vine huahuadia kakorodia amo ba ubugu,  
 apolo huahuadia amo ba hagoadagu,  
 badina be uraheni ese e hamasegumu.

<sup>6</sup> Imana laurina amo bema hahekwinagu,  
 imana idibana amo bema rosigu.

<sup>7</sup> Ierusalem kekenimui e, na hağanimuimu,  
 uda nanidia bona dia daidai,  
 uraheni na basio haoa

---

‡ **1:17** “Beroso” na au ta ladana, Heberu gado ai.    \* **2:1** “Sosana”  
 na Heberu taudia edia herahera avana ta.

ela bona sibona baine noga.

<sup>8</sup> Egu lalokau tauna gadona!  
 A itaia, ia na e maimu;  
 ororo badadia ai e roho daemu,  
 ororo maraḡidia ai e roho laomu.

<sup>9</sup> Egu lalokau tauna na uda nanina  
 eiava dia natuna na heto.

A itaia, emai ruma murimurinai e ginimu,  
 gaba-mauruna amo e ha-igomu,  
 makamaka amo e igo vareaimu.

<sup>10</sup> Egu lalokau tauna ese e hereva henigumu,  
 ini e gwau tomamu:

Egu lalokau e, a tore isi!  
 Hane namo e, aitala!

<sup>11</sup> Keru negana vada e ore;  
 medu vada e doko.

<sup>12</sup> Tano heraheradia vada e tubu;  
 ane-abi negana vada e kau;  
 bona pune na e taimu eda tano ai.

<sup>13</sup> Suke huahuadria e dobimu,  
 vine buredia e papamu,  
 bonadia na e daemu.

Egu lalokau e, a tore isi!  
 Hane namo e, aitala!

<sup>14</sup> Egu pune e, oi na nadi matudia ai;  
 oi na haga kohuadria ai.

Vairamu bama itaia,  
 bona gadomu bama kamonai;  
 badina be gadomu na namo,  
 bona vairamu na mai hairaina.

\*\*\*\*\*

**15** Aoma, mariboi baita idoadia,  
 ena be mamaragi to  
 idia ese vine imeadia e hadikamu,  
 badina na eda vine buredia e papamu.

\*\*\*\*\*

**16** Ia na egu lalokau, lau be ena lalokau;  
 ia ese ena mamoe e ubudiamu, sosana bogaragidiai.

**17** Egu lalokau taumu e, a kerehai,  
 uda nanina eiava dia natuna  
 ororo gabaedia ai na heto;  
 ela bona dina baine keruma,  
 bona hanua baine boi.

**3**

**1** Hanuaboi ai, egu mahuta patana ai,  
 egu lalokau tauna na tahua;  
 na tahua, to asina davaria,  
 na boiria, to ia na se haere.

**2** Aina tore isi, hanua ai baina loa eva-eva,  
 ariara ai bona noho-bou gabudia ai  
 egu lalokau tauna baina tahua.  
 Na tahua, to asina davaria.

**3** Gima taudia ese e davarigu,  
 hanua ai e loa eva-evava ai;  
 na tai henidia, nato  
 “Egu lalokau tauna so itaia a?”

**4** Na rakatanidia, bena asi vanahana  
 egu lalokau tauna na davaria.

Na dogoa tao, asina kahua nege,  
 ema bona sinagu ena ruma ai,  
 e havaragu hahinena ena daiutu ai,  
 na hakaua dae.

<sup>5</sup> Ierusalem kekenimui e, na hağanimuimu,  
 uda nanidia bona dia daidai,  
 uraheni na basio haoa  
 ela bona sibona baine noga.

\*\*\*\*\*

<sup>6</sup> Una na dahaka, tano ġaġaena amo e maimu,  
 kwalahu dubuna na heto,  
 mai bonana, muro bona lebona\*  
 bona hoihoi tauna ena muramura mai bona-  
 dia ibouboudia?

<sup>7</sup> A itaia, Solomon ena ivitoto,  
 goada taudia tauratoi-ahui ese e ginia  
 heġegemu!

<sup>8</sup> Idia na Israel ena goada taudia,  
 iboudiai na mai daredia gabadia ai.

Tuari na mai dibadia;  
 ta ta edia dare na koekoedia ai;  
 hanuaboi ena hahegari ġaudia ilao-ahudia.

<sup>9</sup> King Solomon ena laolao kalagana na  
 Lebanon audia amo e karaia.

<sup>10</sup> Aena na *silver*, tabekau kahana na *gold*;  
 helai ġauna iġovana na dabua kakakakana.  
 Laloma kahana na e haheraia ġoevaġoева,  
 Ierusalem kekenidia ese.

---

\* <sup>3:6</sup> “Muro” bona “lebona” na Heberu taudia edia muramura mai bonadia ladadia.

**11** Siona kekenimui e, a raka lasi;  
 King Solomon ba itaia.  
 Ena havava ġauna be kwarana ai;  
 ena headava dinana ai,  
 lalona e moaleva dinana ai,  
 sinana ese ia kwarana e havavalaia.  
 \*\*\*\*\*

**4**

- 1** Egu lalokau e, oi na hane namo;  
 momokani, oi na hane namo.  
 Matamu na pune,  
 vairamu iğovalaina dabuana murinai.  
 Huimu na nani serina,  
 Gilead ororona amo e hekei dihomu na heto.  
**2** Isemu na mamoe serina huidia vada e utu  
 bena digu gabuna amo e daemu na heto;  
 iboudiai na mai natudia vara-hekapa,  
 ta se raka edeamu.  
**3** Udu mu bibinadia na varo kakakakadia na  
 heheto;  
 udumu na mai hairaina.  
 Vahamu ruaosi na rimono\* huahuana e ivaia  
 parara na heto,  
 vairamu iğovalaina dabuana murinai.
- 4** Aiomu na David ena kohoro na heto,  
 ena tuari ġaudia e haboumu gabuna;  
 unuseni ai kesi daha-ta hetau dadae,  
 iboudiai na tuari taudia edia kesi.
- 5** Ratamu ruaosi na uda nanidia natudia rua na  
 heheto,

---

\* **4:3** “Rimono” na Heberu taudia edia au huahua ta.

uda nanina hahinena natuna vara-hekapa,  
sosana bogaragidiai e anianimu ġaudia.

<sup>6</sup> Lau na muro ororona bainala,  
lebona<sup>†</sup> ororona baina lao henia,  
ela bona dina baine keruma,  
bona hanua baine boi.

<sup>7</sup> Egu lalokau e, oi na hane namo;  
oi na asi bebeka-bebekamu.

<sup>8</sup> Adavagu e, Lebanon amo baita raka hebou,  
Lebanon amo baita raka hebou.  
Amana bona Seniri bona Heremon ororodia  
doridia,  
bona leona edia kohua bona taiga edia ororo,  
ba rakatanidia.

<sup>9</sup> Taihugu e, adavagu e,  
lalogu vada o hamanokaia.  
Matamu ena halari tamona ai,  
aiomu agevana ena herahera nadina tamona  
ai,  
lalogu vada o hamanokaia.

<sup>10</sup> Taihugu e adavagu e,  
emu uraheni na daka gaiho!

Emu uraheni ese vine ranuna e hereaiamu,  
emu dehoro bonana ese muramura iboudiai  
bonadia e hereadiamu.  
<sup>11</sup> Adavagu e, bada-ranuna na udumu bibinadia  
amo e hetuturumu,

---

<sup>†</sup> **4:6** “Muro” bona “lebona” na Heberu taudia edia muramura mai  
bonadia ladadia.

bada-ranuna bona rata na malamu henunai;  
 emu dabua bonadia na  
 Lebanon bonana na heto.

<sup>12</sup> Taihugu, adavagu, na e hekou kunuka-kunuka  
 umana;  
 e hekou kunuka-kunuka umana,  
 e hekou ahu ranuna.

<sup>13</sup> Emu uma ai e varamu ġaudia na  
 rimono‡ audia mai huahuadia herea-daedia,  
 bona kofere bona nerede;  
<sup>14</sup> oibe, nerede bona karakomo,  
 bona kane bona kinamomo,  
 bona lebona audia iboudiai;

bona muro bona aloe,§  
 bona muramura hereadria iboudiai.

<sup>15</sup> Hari uma na mai ranu-lohilohi gabuna,  
 bona mai mauri-ranuna gurina,  
 bona mai sinavai-sinavaina,  
 Lebanon amo e arumu.

\*\*\*\*\*

<sup>16</sup> Lai mirigini e, a nog!  
 Dih e, a toa! Egu uma ba toa henia,  
 ena muramura bonadia ba oda rohoroholai.  
 Egu lalokau tauna na ena uma ai baine raka  
 vareai  
 ena huahua herea-daedia baine ani.

\*\*\*\*\*

---

‡ **4:13** “Rimono” na Heberu taudia edia au huahua ta. § **4:14**  
 Kofere; nerede; karakomo; kane; kinamomo; lebona; muro; aloe.  
 Ini na Heberu taudia edia muramura mai bonadia haida ladadia.

## 5

<sup>1</sup> Tadigu e, adavagu e,  
     egu uma lalonai na raka vareaimu.  
 Egu muro bona egu muramura mai bonadia na  
     haboudiamu;  
     bada mai ranuna ida na aniamu,  
     egu vine ranuna bona egu rata na inumu.

\*\*\*\*\*

O hetura hehenimu taumui e,  
     bavaniani, vine ranuna ba inua.  
 O helalokau hehenimu taumui e,  
     ba inuinu, ba inu momo.

\*\*\*\*\*

<sup>2</sup> Na mahuta, to lalogu be noga;  
     A kamonai, egu lalokau tauna e pidipidimu.

\*\*\*\*\*

Taihugu e, egu Ialokau,  
     egu pune, oi na ġoeva-dae!  
     Iduaragu ba kehoa.  
 Badina be hunu ese kwaragu vada e hapariparia,  
     hanuaboi hununa ese huigu vada e hapari-  
     paria.

\*\*\*\*\*

<sup>3</sup> A lau be dabua vada na dokia oho,  
     ma ede baina dokia lou toma?  
 Aegu vada na huridia,  
     ma ede baina hamirodia lou toma?

<sup>4</sup> Egu lalokau tauna imana na iduara ikouna ai e  
     daukau,  
     bena kudougu e hetaha.

- 5** Lau na tore isi,  
     egu lalokau tauna iduarana baina kehoa.  
 Muro na imagu amo e hetuturu,  
     muro ranuna na imagu kwakikwakidia amo  
         e hetuturu dobi,  
     iduara ikoulaina auna ai.
- 6** Egu lalokau tauna iduarana na kehoa;  
     to egu lalokau vada e raka oho, ia na lasihia.  
 E hereva negana ai laumagu na e daure,  
     a na tahua negana ai asina davaria,  
     bona na boi henia negana ai ia na se haere.
- 7** Gima taudia ese e davarigu,  
     hanua ai e loa eva-eva ai;  
 idia ese e dadabagu bona e haberogu,  
     egu hetaru e abihaigu,  
     mağu igimana taudia ese.
- 8** Ierusalem kekenimui e, na hağanimuimu,  
     egu lalokau tauna boma davaria, boma  
         hamaoroa,  
     uraheni ese e hamasegumu.
- \*\*\*\*\*
- 9** Hane namo e,  
     emu lalokau tauna ede e herea tomamu?  
 Ede e herea tomamu dainai  
     bena ini o hağanimai tomamu?
- \*\*\*\*\*
- 10** Egu lalokau tauna kopina na ġoева ġoева bona  
         kakakaka,  
         gerebu-ta bogaragidiai ia mo sibona herea.
- 11** Kwarana na *gold* namo-hereana;

ia na hui-tuma, bona huina na korema-korema,  
galo huina na heto.

<sup>12</sup> Matana na ranu badidia ai e nohomu punedia na heheto,  
rata ai e huridiamu, e heato ġoevadaemu.

<sup>13</sup> Vahana na muramura avadia umadia na heheto,  
mai bonadia.

Bibinana na sosana,

muro\* ranuna na idia amo e vevemu.

<sup>14</sup> Imana na *gold*, e hakuboroa heġeġe ġauna,  
mai herahera nadidia ida.

Tauna na aivori,  
mai sapairo† nadidia ida.

<sup>15</sup> Aena na bauka-bauka, nadi kurokurona na heto;  
hehedaikau *gold*-na ai e hadaidia kau.

Ita-itana na Lebanon na heto;  
hairaina na Lebanon sidadia na heheto.

<sup>16</sup> Ena hereva na gaiho herea;  
lau na ura henia lalo-dikamu.

Ierusalem kekenimui e, egu lalokau bunai,  
bona turagu bunai.

## 6

<sup>1</sup> Hane namo e,  
emu lalokau tauna na ede ela?  
Emu lalokau tauna na ede kaha ai vada e raka siri?  
Edesenai ai baita tahua?  
\*\*\*\*\*

\* <sup>5:13</sup> “Sosana” na Heberu taudia edia herahera avana ta. “Muro” na edia muramura mai honana ta. † <sup>5:14</sup> “Aivori” na eiefant doana. “Sapairo” na Heberu taudia edia nadi hururu-hururuna ta ladana.

<sup>2</sup> Egu lalokau na ena uma vada ela,  
     ena muramura avadia umana.  
 Uma ai ena mamoe baine ubudia,  
     bona sosana heraheradua baine haboudia.

<sup>3</sup> Ia na egu lalokau, lau be ena lalokau;  
     ia ese ena mamoe e ubudiamu,  
     sosana\* bogaragidiai.

\*\*\*\*\*

<sup>4</sup> Egu lalokau e, oi na mai hairaimu, Tirisa na heto;  
     hairaimu na herea, Ierusalem na heto;  
 itamu na mai garina, tuari oreana mai pepena na  
     heto.

<sup>5</sup> Asio raraigu, badina be matamu ese e  
     hamanoka-manokagumu.

Huimu na nani serina  
     Gilead ororona amo e hekei dihomu na heto.

<sup>6</sup> Isemu na mamoe serina  
     digu gabuna amo e daemu na heto;  
 iboudiai na mai natudia vara-hekapa,  
     ta se raka edeamu.

<sup>7</sup> Vahamu ruaosi na rimono† huahuana e ivaia  
     parara na heto,  
     Vairamu iñovalaina dabuana murinai.

<sup>8</sup> Lohia hahinedia na tauratoi-ahui,  
     hesiai hahinedia na taurahani-ahui,  
     ulato na asi iduahidua.

<sup>9</sup> Egu pune na ñoeva-dae, ia mo sibosibona;  
     ia na sinana ena lalokau,  
     e havaraia hahinenatuna herea-daena.

\* <sup>6:3</sup> “Sosana” na Heberu taudia edia herahera avana ta. † <sup>6:7</sup> “Rimono” na Heberu taudia edia au huahua ta.

Ulato ese e itaia, bena e hanamo;  
 lohia hahinedia bona hesiai hahinedia ese e  
 itaia,  
 bena e imodaia.

<sup>10</sup> Ina be daika, ita-itana na daba e reremu na  
 heto?

Mai hairaina hua na heto?  
 Mai diaridiarina dina na heto?  
 Itana na mai garina, tuari oreana mai pepena  
 na heto, ani?  
 \*\*\*\*\*

<sup>11</sup> Okari imeana na lao henia,  
 koura heraheradia baina itadia;  
 baina itaia, vine vada e tubu eiava;  
 baina diba, rimono<sup>‡</sup> vada e kobo eiava.

<sup>12</sup> Asi vanahana na mata hanai: lau na kariota ai,  
 egu lohia tauna badibadinai nato.  
 \*\*\*\*\*

<sup>13</sup> Sulama kekenina e, a lou mai, a lou mai;  
 baina raraimu tao, a lou mai, a lou mai.  
 \*\*\*\*\*

Badina be dahaka Sulama kekenina ba raraia,  
 Mahanaim mavaruna boma raraia na heto?  
 \*\*\*\*\*

## 7

<sup>1</sup> Lohia kekenimu e,  
 emu mai tamakadia ida be daka hairai!  
 Mamumu bauka-baukadia na herahera nadidia  
 na heheto,  
 karakara tauna namona ese e kara.  
<sup>2</sup> Hudomu na kehere kuboruna na heto,

---

<sup>‡</sup> **6:11** “Rimono” na Heberu taudia edia au huahua ta.

- vine ranuna ai e honu hanaihanaimu.  
 Bogamu na uit isenuna ta,  
     sosana\* ese e haheğeğea daemu.
- <sup>3</sup> Ratamu ruaosi na uda nanidia natudia rua na  
     heheto,  
     uda nanina natuna vara-hekapa.
- <sup>4</sup> Aiomu na kohoro na heto,  
     aivori<sup>†</sup> amo e hadaia ġauna.  
 Matamu na Hesebon gohugohudia,  
     Batarabim ikoukouna bādibadinai.  
 Udu-baubau mu na Lebanon kohorona na heto,  
     Damasko roha-hekeina.
- <sup>5</sup> Kwaramu na mai hairaina, Karamele ororona na  
     heto;  
     bona huimu heveriveridia na varo kakakaka-  
         dia na heheto,  
     hanua pavapavana na huimu ai vada e heau  
         kau.
- \*\*\*\*\*
- <sup>6</sup> Lalokau e, moale ihavarana kekenimu,  
     oi na hane namo, oi na mai hairaimu.  
<sup>7</sup> Emu lata na buatau auna na heto,  
     bona ratamu na buatau takodia na heheto.  
<sup>8</sup> Lau na tomu, Buatau auna baina dae,  
     bona takona baina abidia.  
 Ratamu na vine takodia ida bae heğereğere,  
     udumu bonana na apolo bonadia  
         heğereğeredia.
- <sup>9</sup> Emu haherahu na vine ranuna namo-hereana  
     na heto,  
     i'inuna na mai gaihona,  
     bibinagu ai bona isegu ai.

---

\* **7:2** "Sosana" na Heberu taudia edia herahera avana ta.   † **7:4**  
 "Aivori" na elefant doana.

\*\*\*\*\*

**10** Lau na egu lalokau tauna ena;  
ia ese e ura henigumu.

**11** Egu lalokau e, aoma!  
aita raka lasi tano paka ai,  
hanua marağidia ai baita noho;

**12** daba ai vine imeadia baitala,  
baita itaia, vine vada e kobo dae eiava,  
baita diba, buredia vada e papa eiava,  
baita tahua, rimono<sup>‡</sup> vada e tubu eiava lasi.  
Unuseni ai baina ura henimu.

**13** Dudai§ bonadia na e daemu,  
emai iduara daediai na huahua namo-  
hereadria idau-idau,  
matamatadia bona gunadia,  
vada na haboudia oiemu,  
egu lalokau e!

## 8

**1** Bema oi na lau taihugu,  
sinagu ratana e inuava tauna,  
ariara ai baitama hedavari bena bama  
harahumu,  
bona ta ese basinema ihi-ihiraigu.

**2** Sinagu ena rumai,  
e havaragu hahinena ena daiutu ai,  
bama hakaumu vareai.

Vine ranuna mai muramurana bama henimu,  
egu rimono ranuna bama ha-inulaimu.

---

<sup>‡</sup> **7:12** “Rimono” na Heheru taudia edia au huahua ta.  
“Dudai” na Heheru taudia edia muramura avana ta.

<sup>3</sup> Imana laurina amo bema hahekwinagu,  
imanā idibana amo bema rosigu.

<sup>4</sup> Ierusalem kekenimui e, na haǵanimuimu,  
uraheni na basio haoa,  
ela bona sibona baine nogā.  
\*\*\*\*\*

<sup>5</sup> Una na daika, tano ǵaǵaena amo e maimu,  
ena lalokau tauna enai e tabe kaumū?  
\*\*\*\*\*

Apolo auna henunai na haomu;  
unuseni ai sinamu e hekamonaiva,  
unuseni ai e havaramu hahinena na hisi e  
aniva.

<sup>6</sup> Toagu avatoa lalomu ai,  
toagu avatoa imamu ai.

Lalokau ena goada na mase ena goada  
heǵereǵerena,  
bona mama ena daǵedaǵe na mase gabuna  
ena daǵedaǵe heǵereǵerena;  
ena ǵaraǵara na lahi ǵaraǵarana na heto,  
ena siahu na lahi hururu-hururuna siahuna  
na heto.

<sup>7</sup> Ranu momo ese lalokau basie habodoa diba;  
utu-utu badadia ese basie utua dae diba.

Tau ta ese ena taǵa idoinai bema henī dudu kau,  
lalokau davana,  
to basinema heǵereǵere;  
bema dadaraia vaitani.  
\*\*\*\*\*

<sup>8</sup> Tadimai ta do asi ratana.  
Tadimai ede baia durua toma,

tau ta ese baine herevalaia negana ai?

<sup>9</sup> Ia na bema magu, *silver* amo baia ha-aukaia;  
bema iduara, sida reireidia amo baia koua  
ahu.

\*\*\*\*\*

<sup>10</sup> Lau na maḡu, ratagu na kohoro na heto;  
e herevalaigu tauna vairanai  
lau na maino imailaina.

\*\*\*\*\*

<sup>11</sup> Solomon ena vine imeana ta be Baal-hamono ai;  
ia ese imea ireguna taudia e habadinalaidia.  
Ta ta *silver* monidia dahan-ta dahan-ta e hen,  
imea anina davana.

<sup>12</sup> Solomon e, oiemu dahan-ta bavabia;  
vine ireguna taudia edia sinahu-rua bae abi  
danu.

A lauegu vine imeana na lauegu korikori,  
lau sibogu egu.

<sup>13</sup> Imea ai o nohomu taumu e,  
bamogu na e hakalamu, gadomu ikamonaina  
totona;  
lau danu eremu bama kamonai.

<sup>14</sup> Egu lalokau e, aoma haraḡa,  
uda nanina eiava dia natuna  
muramura ororodia ai na heto.

**Buk Baibel long tokples Motu  
The Holy Bible in the Motu language of Papua New  
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

---

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca